

Dia pa dia Lionfish rond di Aruba ta birando mas grandi

ORANJESTAD - Ultimo dianan aki, buceadonan ta catch Lionfish masha grandi. Presidente di Aruba Marine Park Foundation, Rudy Davelaar, hunto cu otro buceadonan, ta sacando e piscanan aki for di nos awanan teritorial. Lionfish ta peligroso pa nos bida marino y nan por caba practicamente cu nos piscanan den lama.

LIONFISHNAN GIGANTESCO

Segun Davelaar, den e delaster dos simannan cu a pasa aki, Aruba Marine Park Foundation a sali y a haya par di area atrobe cu pa nan sorpresa tabata tin Lionfish hopi grandi. Tur e Lionfish cu a wordo gara durante e simannan aki no ta cay bao di 30 centimeter. Esun di mas grandi ta 45 centimeter y tur e sobranan ta varia entre 40 y 45 centimeter. E buceadonan a gara un total den luna di september, mas of menos 32 kilo. Pa e prome siman di october so caba ta para riba 31 kilo. Por mira cu den cierto areanan manera cu ta keda dive y controla constantemente otro areanan, ta bolbe yena un biaha mas cu Lionfish. E fundacion a haya tambe aviso di algun luga di sambuya, en particular e parti zuid di Aruba, aeropuerto bay ariba, cu a bolbe cuminsa mira atrobe Lionfish den e rif. Aruba Marine Park Foundation, hunto cu su boluntarionan, lo bay keda monitor esaki.

TORNEO

Den cuadro di esaki, Aruba Marine Park Foundation, lo bay tene su di dos torneo pa e aña aki dia 3 di november. Esaki lo bay tuma luga na De Palm Island, hunto cu De Palm Tours y a dicidi pa cambia e sede di e di dos torneo aki. Na luga di pone na Centro di Pesca Hadicurari, a dicidi bay na De Palm Island.

STIMULA PUBLICO

Aruba Marine Park Foundation ta hayando hopi pedido. E torneonan aki lo bay tin nan prijsnan di cash entre otro. E prijsnan no ta asina tanto. E intencion ta pa stimula hende pa sigui gara Lionfish. E ekipo di divesitnan aki ta birando dia pa dia mas grandi si no keda riba di dje. Apart di Aruba Marine Park Foundation, tin otro boluntarionan tambe cu ta tumando riba nan mes e iniciativa pa sambuya tambe, pero e competencia ta djis pa bin hunto riba un dia y mira si por gara mas tanto posibel hunto, cu tur e jaagdonan cu ta participa.



Continuacion di pagina 5



Esey ta e preocupacion di Aruba Marine park Foundation, cu ta sinti cu e Lionfish dia pa dia ta birando mas grandi y cu mester yega na un manera pa caba cu nan for di nos awanan teritorial.

UN PISCA FOR DI SU ZONA

Lionfish (Pterois antennata), eroneamente yama como Scorpion Fish, ta un pisca di e famia Scorpaenidae. Su habitat natural ta e lagun y rifnan di Oceano Indico tropical y Pacifico occidental. E ta sconde den dia y ta jaag riba cabaron y cangreu durante anochi. Normalmente e ta crece na un maximo di 20 centimeter, pero manera cu Sr. Davelaar a anuncia, ya algun di nan ta yega riba un midi maximo di 45 centimeter.

Su pica ta venenoso: e antenanan na su spina patras, dos di e antenanan na su spina central y dos di e spina anal ta ekipa cu glandula venenoso. E picaduranan aki por provoca herida doloroso na buceadonan, mientras cu e veneno cu e ta incorpora por causa paralisis respiratorio humano, deficiencia di circulacion di sanger y keintura. E sintomanan generalmente ta desaparece despues di algun dia. E ta un pisca solitario y hopi probabel por haya den fondo, caminda e ta landa lentamente, conduciendo y hincando su prooi den un skina cu su spina nan. E piscanan aki ta un epidemia y hopi hende na Aruba no ta comprende e impacto cu esaki tin riba nos medio ambiente.

20 PA 30 MIL WEBO CADA 5 DIA

Davelaar a splica cu riba tera por ehempel boa ta afecta varios di nos tiponan di parha. E ta afecta lagadishi, yuwana

y diferente tipo di bestia cu nos tin den nos medio ambiente terrestre. Pero bao di awa, e problematica ta mucho mas grandi, pasobra Lionfish ta reproduci cada 5 dia, 20 pa 30 mil webo. Den un aña un pisca muhe por produci mas of menos 2 miyon webo. Esaki si bisa djis un porcentahe di dje so a sali for di webo y bira adulto. Ta papiando aki di 20 pico mil Lionfish cu cada pisca muhe so lo por logra cu ta yega adulto. Esey ta si coy un porcentahe masha abao mes. E unico cos cu Aruba Marine Park Foundation ta

haci pa preveni e expansion di e poblacion di Lionfish ta door di gara nan mas tanto posibel y door di gara nan bo ta preveni cu nan ta plama of ta reproduci y cu nan ta haci mas daño na e medio ambiente marino door di come e piscanan riba rif.

UN PROBLEMA CU MES-TER WORDO ERADICA

E especie aki a haci su aparicion na Aruba no mucho tempo pasa, pero pa e tempo cu el a manifesta su mes den awanan teritorial di Aruba, el a haci basta efecto caba riba nos fauna marino. □

